

Unisza raih 35 pingat emas di MPI 2018

KUALA NERUS 10 April - Universiti Sultan Zainal Abidin (Unisza) meraih 35 pingat emas daripada keseluruhan 77 yang diberikan kepada universiti awam dalam Minggu Penyelidikan dan Inovasi (MPI) 2018 di Stadium Tertutup Gong Badak di sini semalam.

Lebih bermakna, pasukan institusi itu muncul pemenang utama kategori Hadiah Anugerah Khas menerusi produk Elektromagnetic Radiation Phone Cover yang dihasilkan oleh Dr. Mohd. Khairul Amri Kamarudin, Mohd. Syafi Mohd. Ridhuan Tee, Roslan Umar, Prof. Madya Dr. Hafizan Juahir, Siti Nur Dianah Abdul Rahman dan Nur Hazmin Subri.

Di samping itu, aplikasi My-Plant DIY (Malaysian Plant Diagnose-it-Yourself) yang dibangunkan Unisza turut mengungguli

kategori sama.

Hadiah disampaikan oleh Pengerusi Jawatankuasa Pendidikan, Sains, Teknologi dan Transformasi negeri, A. Latiff Awang.

Yang turut hadir, Naib Canselor Universiti Malaysia Terengganu (UMT), Prof. Datuk Dr. Nor Aieni Mokhtar; Pengarah Pusat Pengurusan Penyelidikan, Inovasi & Pengkomersialan (RMIC) Unisza, Prof. Madya Dr. Saiful Bahri Mohamed dan Rektor Kolej Universiti TATI (TATIUC), Prof. Madya Dr. Mohd. Zamri Ibrahim.

Sebanyak 311 penyertaan diterima dalam pertandingan selama tiga hari bermula Sabtu anjuran RMIC Unisza dengan kerjasama UMT dan TATIUC itu sebagai wadah buat ahli akademik untuk melebar luas hasil inovasi mereka

dalam mendepani cabaran revolusi industri 4.0.

UMT memenangi 30 pingat emas manakala selebihnya menjadi milik TATIUC dan Universiti Putra Malaysia (UPM) di samping tujuh anugerah diberikan untuk kategori sekolah.

Terdahulu, A. Latif turut menyaksikan pertukaran memorandum perjanjian (MoA) antara UMT dengan One Team Network Sdn. Bhd. bagi membangunkan penyelidikan mengenai Aedes Tech Mosquito Home (AMHS) bernilai RM123,000.

Sementara itu, A. Latif dalam ucapannya berkata, penganjuran acara itu menjadi platform penting kepada warga penyelidik dalam menghasilkan produk dan idea baharu untuk memantapkan lagi rekaan produk inovasi.